

<><><><><><>

Headlines

- प्रधानमंत्री नरेन्द्र मोदी होरें आखेया ऐ जे भारत दा अंतरिक्ष खेतर वैश्विक निवेशकें लेई इक आकर्षक थाहर बना करदा ऐ। उनें वीडियो कांफ्रेंस दे राहें Skyroot दे Infinity Center दा उदघाटन कीता।
- जमात-ए- इस्लामी संगठन खलाफ कारवाई दे इक हिस्से दे तौर पर पुलसै घाटी च केई थाहरें पर छापे मारे ना।
- पुलसै आतंकवादी गतिविधियें कन्नै जुड़े दे होने दे आरोप च जम्मू थमां किशोर उम्री दे इक जागतै गी गिरफ्तार कीता ऐ। जलशक्ति मंत्री जावेद अहमद राणा होरें मेंढर च नमीं रम्भी गेदी विकास परियोजनाएं गी लागू करने सरबन्धी रुपरेखा दी समीक्षी कीती।
- ते जम्मू खित्ते च सीत लैहर दा प्रकोप जारी ऐ। केई थाहरें पर रातीं दे तापमान च जबरदस्त गिरावट दर्ज कीती गई ऐ।

<><><><><><>

PM –Skyroot Campus

प्रधानमंत्री नरेन्द्र मोदी होरें आखेया जे भारत दा अंतरिक्ष खेतर वैश्विक निवेशकें आस्तै इक आकर्षक थाहर बनदा जा करदा ऐ। मोदी होरें स्काईरूट दे इन्फिनीटि कैम्पस दा वीडियो कांफ्रेंस राएं उदघाटन कीता। इस मौके पर बोलदे होई उनें आखेया जे सरकार नै देशै दे खल्लास आले खेतर लेई केई सारे ऐतिहासिक सुधार कीते ना। प्रधानमंत्री नरेन्द्र मोदी होरें आखेया जे सरकार नै अंतरिक्ष खेतर गी नीजि नवाचार आस्तै खोली दिता ऐ- जेदे कन्नै स्टार्ट-अप दे उद्योग देशै दे साईसी पारिस्थितिकी तंत्र कन्नै मिलियै कम्म करी सकगंन। उनें आखेया जे अगले किश बरें च वैश्विक अंतरिक्ष अर्थबवस्था केई गुणा बढोग ते मुल्ले दे युवाएं आस्तै केई सारें मौकें पैदा होगंन। उनें आखेया जे पिच्छले 7एं बरें च भारत नै अपने इस खेतर च केई सुधार कीते न ते अज्ज 3 सौ थमां बढ अंतरिक्ष स्टार्ट-अप इस दिशा च भारत दे सरबन्धी भविष्य गी नमीं मेद देया रदे ना। उनें आखेया

<><><><><><>

Kmr-Raids

बंदिश आले संगठन जमात –ए-इस्लामी खलाफ जारी कारवाई दे इक हिस्से दे तौर पर पुलसै-कश्मीर घाटी च बक्ख-बक्ख थाहरें पर छापे मारे ना। एह छापेमारी अनंतनाग- पुलवामा- बडगाम- कुलगाम ते कुपवाड़ा जिले च कीती गई ऐ। पुलसै इस दरान रिहायशी थाहरें पर जमात-ए-इस्लामी दे सदस्यें कन्नै जुड़े दे होरनें ठिकानें गी निशाना बनाया। जमात-ए-इस्लामी दे किश सदस्यें दे राष्ट्र-वरोधी गतिविधियें च शामिल होने बारे थहोई दियें खूफिया जानकारीयें दी बिनाह उप्पर एह छापेमारी कीती गई ऐ। इस दरान संगठन ते एहदे संस्थानें कन्नै जुड़े दे लोकें दे घरें थमां इलैक्ट्रानिक उपकरण- दस्तावेज ते किश साहित्यिक समग्री जब्त कीती गई।

<><><><><><>

Terror Arrest

पुलसै संदिग्ध आतंकवादी गतिविधियों कन्नै जुड़े दे होने दे आरोप च 19एं बरे दे इक किशोर गी गिरफ्तार कीता ऐ ते ओदे शा जब्त कीते गेदे डिजिटल उपकरणों दी जांच कीती जा रदी ऐ। आकाशवाणी दे जम्मू संवाददाता दी रिपोर्ट मुजब- पुलसा दे इक प्रवक्ता नै दस्सेया ऐ जे आरोपी- रियासी जिले दा बसनीक ऐ ते ओह मजूदा समें च बठिंडी इलाके च रवा रदा हा। आतंकवादी गतिविधियों च मुख आरोपी दे तौर पर ओदा नां सामने औने पर बाहु फोर्ट पुलस थाने च BNS दी दफा 113(3) दे तैहत ओदे खलाफ मामला दर्ज कीता गया ऐ। पुलसै आखेया ऐ जे शुरुआती जांच च एह गल्ल सामने आई ऐ जे आरोपी गी ऑनलाईन गै कट्टरवादी बनाया जा रदा हा ते ओह कथित तौर पर इक आतंकवादी कारवाई दी योजना बना करदा हा। अधिकारियों इब्बी दस्सेया ऐ जे संदिग्ध नै मोबाईल फोन दे राहें पाकिस्तान ते होरनें किश मुलखें दे किश नम्बरें कन्नै राबता रक्खे दा हा। इस किशोर उम्मी दे आरोपी थमां जब्त कीते गेदे डिजिटल उपकरणों दी जांच कीती जा रदी ऐ ते अगड़ी तफतीश जारी ऐ।

<><><><><><>

Modern Looms

कश्मीर दिएं दस्तकारिएं ते हथखड्डिएं सरबंधी विभाग नै कैपेक्स 2025-26 दे तैहत कलीन दी बुनाई आहले अपने सिखलाई केंद्रें लेई नमीं किस्मै दिएं 25 आधुनिक फौलादी खड्डिएं दी खुश-खरीद कीती ऐ। उन्न दे विकास आहले केंद्री बोर्ड दी व्हुल प्रोसेसिंग स्कीम दे तैहत मजूदा माली बरें लेई कपड़ा मंत्रालय आसेआ लाभार्थी बुनकरें आस्तै मंजूर कीती गेदी कलीन बनाने आहली 100 बादू खड्डिएं दे अलावा एह 25 फौलादी खड्डियां दित्तियां गेइयां न। प्रेस लेई जारी इक बयान च इस बारै ब्यौरे सांझे करदे होई मैहकमे दे इक प्रवक्ता नै आखेआ ऐ जे इनें नमी फौलादी खड्डिएं गी इस चाल्ली कन्नै तैयार कीता गेदा ऐ जे इन्दे कन्नै अराम कन्नै बौहने दी बवस्था, लत्तें लेई थाह ते पिट्ट लेई ढासने दी बवस्था बी कीती गेदी ऐ।

<><><><><><>

UIDAI

टकोह्दी पंछान सरबंधी भारती प्राधिकरण यानि UIDAI नै राश्ट्रव्यापी अभियान दे तैहत 2 करोड़ थमां बढ़ मृतकें दे आधार नंबर बंद करी दित्ते न। सूचना प्रौद्यौगिकी मंत्रालय नै जानकारी दित्ती जे यू.आई.डी.ए.आई नै एह आंकड़े भारत दे रजिस्ट्रार जनरल, राज्यें ते केंद्री राज पबंधन आहले क्षेत्रें थमां लैते न। उनें आखेआ जे कोई बी आधार नंबर कुसा होर गी नेई दित्ता गेआ ऐ। मंत्रालय नै आखेआ ऐ कि जेकर कुसा दी मृत्यु होंदी ऐ तां ओहदे आधार नंबर गी बंद कराना जरूरी ऐ तां जे कुसा बी शिनाख्ती धोखाधड़ी या माली धोखे थमां बचेआ जाई सकै।

<><><><><><>

Rana –Mendhar Projects

जल शक्ति मंत्री जावेद अहमद राणा होरें मनकोट ब्लाक च 80 करोड़ रुपये दी लागत आहलियों बक्ख-बक्ख विकास परियोजनाएं दा नींह पत्थर रक्खने दे इक दिन मगरा अज्ज मेंडर च इक उच्च स्तरीय जायजा मीटिंग दी

प्रधानता कीती ते खिते च चला रदी विकास परियोजनाएं गी लागू करने दी रुपरेखा ते मौजूदा स्थिति दा जायजा लैता। इस दौरान मंत्री होरें सभ्भनें विकास कम्में गी तय समें अंदर पूरी पारदर्शिता कन्नै मुकम्मल करने दे निर्देश जारी कीते।

<><><><><><>

Udhampur Mushroom

उधमपुर जिले दे करसान खास करियै बेरोजगार नौजवान खुम्बें दी रड़ दे राहें ना शड़ा खरी मती औंदन हासल करा करदे न, सगुआं खिते च इक नमीं कृषि क्रांति दी अगुवाई बी करा'रदे न। जिले दे मकामी करसानें लेई खुम्बें दी रड़, औंदन दा इक बड्डा जरिया बनी गेदी ऐ। ध्यानजोग ऐ जे मुआफक ढांचे ते सिखलाई दे राहें नियंत्रित ढंग'गै कन्नै खुम्बें दी रड़ पूरे ब'रे कीती जाई सकदी ऐ।

साहडे संवाददाता कन्नै गल्ल करदे होई उधमपुर दे टिकरी गां दे इक करसान जोगिन्दर होरें दस्सेया तोंआई खुम्बे दी रड़ बारे होर मती जानकारी सांझे करदे होई सरबंधत विकास अधिकारी विनोद गुप्ता होरें गलाया

<><><><><><>

Reasi –Mushrooms

रियासी दे Sool गां च राई-बाई दा इक नमां दौर दिखने गी लब्बा रदा ऐ ते जिले दे बसनीक राकेश कुमार राई-बाई दे क्षेत्र च विकास ते नवाचार दे करसान बनी गे न। राकेश नै मक्क ते कनकू दी फसल गी छुड़ियै खुम्बे दी राई-बाई शुरु कीती- जेहदे कन्नै- उनेंगी हर-रोज 5 हजार शा 6 हजार रुपये दा लाह हासल होआ रदा ऐ ते ओह रोजा दी 70 शा 80 किलो खुम्ब बेचदे न। साहडे संवाददाता कन्नै अपनी खुशी जाहर करदे होई राकेश कुमार होरें गलाया

तोंआई खुम्बे दी रड़ बारे गल्ल करदे होई कटड़ा दे सब-डिविजनल राई-बाई अधिकारी राकेश कुमार होरें आखेया

<><><><><><>

Accident

अज्ज जम्मू-पठानकोट जरनैली सिड़क उप्पर बना रदे इक फ्लार्ड-ओवर दे पिलर कन्नै इक बस दी टकर बजने करी- ओहदे च सवार 13 यात्रु घायल होई गे। अधिकारियें मुजब एह हादसा बड़ी-ब्राह्मणा इलाके दे नेडे पेश आया- जंदू जम्मू शा कठुआ जा रदी बस ड्राइवर दी तेज रफ्तार करी बस्- चान-चक्क पिलर कन्नै जाई बजी। सभ्भनें घायलें गी नेड़में अस्पताल पजाया गया।

<><><><><><>

Weather

जम्मू दे मते सारे हिस्सें च जंदी रातीं थमां ठंडू दा प्रकोप बधी गेदा ऐ ते तापमान च गिरावट दर्ज कीती गेई ऐ। आकाशवाणी दे जम्मू संवाददाता नै जानकारी दिती ऐ जे जम्मू प्रांतै च तापमान काफी झिगड़ा आई गेआ ऐ। जम्मू प्रांतै दे पदरे इलाकें च तापमान इयां रेया। जम्मू च 8 इशारिया 7 डिग्री, कटड़ा च 8 इशारिया 5 डिग्री,

कठुआ च 8 इशारिया 2 ते जम्मू ब्हाई अड्डे पर रिकार्डिंग दे मताबक तापमान 10 इशारिया 1 डिग्री सेल्यिस दर्ज कीता गेआ ऐ, जिसलै जे प्रांतै दे उप्परले इलाके च तापमान, बनिहाल च 0 इशारिया 1 डिग्री, भद्रवाह च 0 इशारिया 4 डिग्री, बटोत च 4 डिग्री, रामबन च 4 इशारिया 1 डिग्री, राजौरी च 2 डिग्री, किश्तवाड़ च 3 इशारिया 4 डिग्री, रियासी च 6 इशारिया 9 डिग्री ते उधमपुर च 4 इशारिया 6 डिग्री सेल्यिस दर्ज कीता गेआ ऐ।

<><><><><><>